


叢書
中國地方志
中華北方

525

河北省

柏鄉縣志

二



中國方志叢書·華北地方·第五二五號

據

民國·牛寶善纂修，魏永弼編輯
民國二十一年刊本

影印

河北省

柏鄉縣志

(二)

成文出版社有限公司印行

中華民國六十五年

月臺一版

柏鄉縣志

全二冊

發行人：**黃成助**

出版者：**成文出版社有限公司**

台北市郵政信箱二二六〇五號
台北市羅斯福路三段二四〇巷五號

印刷者：**成文出版社有限公司**

內政部登記證內版台業字第一一四七號

民國二十一年十二月

柏鄉縣志

汪克成題

柏鄉縣志卷第六

柏鄉縣縣長汲川牛壽善輯

名宦

官師之垂名必有實政一時之名可僞作百世之名信史猶後也先不忘於士民之口與其尸祝之心朱邑生爲大司農死命其子葬桐鄉謂我故桐鄉吏後世子孫奉嘗我不如桐鄉民胡安定爲蘇湖教授迄今兩地皆祠之甚矣人心易感即不易欺也柏邑名宦其載在舊志者大概据原文紀之惟百年以來治行教澤要自不少惜得諸父老傳聞者甚略殘闕之憾當次第補之誌名宦

周

王喬樾爲武陽人爲柏人令於此得仙

「舊志」接神之說固難盡信而斐秀冀州說所載王喬爲柏人令見於

史記封禪書注其必有據故錄之以備考官斯地者若能兩袖清風則仙令冷然猶可想見云

唐

王佐隴州人開元間令築千金堰浚萬金渠以疏積潦興水利

祀名宦

宋

侯蒙高密人第進士徽宗時知柏鄉民訟立決於庭罰者不怨轉運使黃湜聞其名召詣行臺蒙以越境不往湜怒他日行縣閱理文案欲致其罪無疵可指始以賓禮見曰公眞能吏也率諸使合薦之歷殿中侍御史變疏十事悉訥之西師失利上怒

欲寘五路將十八人於法詔蒙按問力爲申釋拜御史中丞一日帝問蔡京何如人對曰使京正其心術古賢相何加京啣之累遷刑部尙書同知樞密院進中書侍郎卒贈開府儀同三司諡文穆祀名宦

元

馮安邑之正元里人世祖時史天澤開府正定往從之破武仙下河南授宣將軍辛卯主臨城簿尋遷高邑丞大德元年爲本縣令時遭變後流亡不少所至多安集戊戌大飢發粟賑之一時全活甚衆旣乃以狀上幕府以其能知周急之權不罪也初武仙敗餘黨尙盤山谷間夜出剽掠即率左右馳捕遲明及之

賊衆下馬入林安亦棄馬以短兵踵其後叱之曰若輩爲百姓害久矣何惜微軀必除害而後已毋走賊憚其威皆釋兵受縛喜喜書史尤愛人誦溫公通鑑及左氏傳事可記終身不忘祀名宦

張楫香河人仁宗皇慶二年由潞縣主簿尹柏下車即召問父老知徭役不均徵科無已最爲民病乃爲書第民力強弱升斗之直一日之力必親徵焉吏不能舞弊苗盛時有放馬驢夜食者暮使人於城門伺出牧踐苗者鞭償無犯政暇從一童子挈壺飧往桑田質民勤惰而賞罰之或易服入村落詢民病得吏奸即時除之訟者開譬立遣上吏使理他邑獄者不絕邑人不

知學仍勸趨社學躬爲訓導建輿梁築道路百廢俱舉自下車去任不取一錢且無一利不及民者三載代去民頌其德尙書元明善撰德政碑祀名宦

張眞巨川人皇慶中知縣事縣當驛道繁劇眞處之裕如人有饋餉悉拒絕不受舊有社夫車牛茆遣無法眞爲文簿按而用之交舉互見用出一手吏不得貪緣爲奸有提領劉瑞者負小民路程債俠勢不還反毆之訴於縣立追痛責延祐春帝師北上朝僅所過索馬抗拒略無所憚縣北午橋皆潦下地每秋雨泛濫行旅阻絕築甬路長四十里使行者無滯又訓飭子弟教以農桑孝弟之事境內遂爲樂土流民復業者百餘戶有廉訪

敘事張鵬翼碑記祀名宦

(按)仁宗皇慶止二年次年即改元延祐前張輯以皇慶二年來尹三載此又云皇中知縣又序延祐

索馬事兩人似同

時矣年號疑有誤

升閭忠翊順帝元統初知縣事察民瘼省風俗以救弊補過興利除害爲任期月之間風行俗化又興學校益生徒而里豪悖禮者悉正法按之民知勸懲之義柏人懷之立遺愛碑學士陳灝撰銘祀名宦

明

汪鉅陝西臯蘭人成化八年以鄉貢進士來知縣事爲人溫雅闊略勇於行義政尚寬平不事矯激興學校督農桑均賦役民賴以安又有強悍必繩以法又因柏俗尚利男女失時諭之以

禮民悉樂從有貧不能葬者施以棺且賻以俸人甚感之尋以憂去服闋謁選國子生李賓等詣銓部保復任政聲益著邑人頌德前後各立一碑一署前一故城鎮祀名宦

訾玉朔州舉人洪治十年任學諭志行高潔動遵禮度不冠不見士日與諸生講解月終試別高下以勸之貧士饋送者固却不受曰姑留易膏油爲讀書之資可也以憂去士有遺思焉祀名宦

馬寫安邑鄉進士嘉靖二十五年由武強諭陞任精明果決事可刃解未數月百廢俱興吏弊釐革殆盡屢忤上官弗恤也廟學頽隘增拓改建煥然一新射禮久廢重修觀德亭講習其中

邑素寡儲多方積蓄至數千石爲新建倉以貯之里書弊多隱漏設法丈量得地五十餘頃刻石縣門某社若干共地若干使人人通曉尤久大之利陞戶部主事歷石阡知府祀名宦

王瓚洮州人嘉靖二十六年由榮澤訓導陞本學諭慷慨豪邁義氣相許貧士婚嫁輒捐俸濟之又於明倫堂前創建門坊見邑人楮宦碑記陞蘭州衛教授祀名宦

李奎祥貴池人性愛梅號梅賓嘉靖三十六年任訓導教人有法剖析不倦輕財好施未嘗以寒官自嗇諸生極貧者濟貸無算不能娶者爲擇配畢婚自置巨柏備身後事聞李生世芳親喪未葬即以賻之柏丞汪士宏卒於官傾貲爲辦喪事遣之歸

殯其前宿負並置勿道四十三年陞昌化諭去之日諸生越境追送泣不忍舍爲立去思碑邑孝廉諸宦撰文祀名宦

劉儲湖南興國舉人隆慶二年任節里費慎刑獄革吏弊調驛遞尤留意學校因過王郎城得五城舖馬蓮灘等處空地十頃有奇申請各上憲以二頃四十五畝給諸生郡人宋儒記其事於碑

高等河南祥符舉人隆慶五年任柏令勸農教士皆以實政蒞民入計京師爲不恪者誣論竟議改降賚志沒於京邸卒之日無棺具同寮輸金以助旅櫬過邑哭震閭巷婦穉皆相向失聲紳士魏賓等爲卜地城南路左繪像立祠捐田供祀每正月初

九日爲不諱之辰會幟盈塞萬曆中知縣張延庭增置田十畝立石祠中記其事祀名宦

張延庭號在海山東濱州舉人萬曆二年尹柏天性和易敷政惠愛不事苛削民有訟聽其自息邑有骹骹數輩旣懲之復假以自新蓋得寬猛張弛之宜者順德境有盜夜殺人郡守欲移責於柏羅致之直指且將論公矣公漠然不撓念士民共爭之不能拔會關中移牒證盜事按其狀果在順德遂上疏論守於公無累邑有囂訟數歲不休上官欲梏之死公廉其狀乃糾於法而卒生之歲魃公減膳步禱於郊雨至濡官服亦不少怠邑當孔道冠蓋旁午亦未見其有惰容修築城垣拓舊基廣丈餘

高逾三尺邑西卑濕橫溢爲患建長堤以障之疏濬槐河田禾
沾利修文教勤考課己卯元馮嘉遇經魁張主敬咸甄拔自柏
諸生有貧不能婚嫁者皆周之在柏六載民受其賜自奉泊如
也擢南戶曹去士民如失慈母居六載來爲順德守過柏老稚
拜迎擁輿不得行皆曰今日乃復見我張公也邑立祠城北沛
水之上祀之唐山王鳳竹高邑趙南星有碑記後陞苑馬卿祀
名宦

孔宏達廣東番禺舉人萬曆三十二年任爲人恂恂謹飭有訟
於庭者多以理論解之不罰贖下車時當路方議革微收投櫃
以防有司之染指達性不嗜利俸入之外不取一錢縣當通衢

厨傳之費一切付之典守者習弊盡滌課士勸農宣講六諭僻鄉亦必親至二年遷上官去高邑趙南星爲序以送之

喻思恂號醒拙四川榮昌人萬曆丙辰進士四十六年來宰柏鄉多德政尤振興學校改泮池於櫺星門前又分建道德坊於池之左右校士立社自爲督課廟期親往命題館餼必腴其貧不能婚葬者出粟炊之後置學田三十餘畝會調繁廣川去留俸金遣學博置買呂兆熊撰文立石仕歷御史巡撫兵部侍郎邑人於城北官道左肖像祠之

高重光字秀恒大寧中衛人由貢生爲柏鄉訓導官荒民作亂重光率健僕吳某出擊之賊潰城以完敘功陞邱縣知縣廉而